

四庫全書

集部

欽定四庫全書

集部

海陵集卷

七至九

詳校官庶吉士臣李如筠

主事臣呂雲棟覆勘

總校官編修臣王燕緒

校對官編修臣盧遂

謄錄監生臣王爾熙

欽定四庫全書

海陵集卷七

宋 周麟之 撰

表

謝賜生餼表

臣某言伏奉詔書以臣生日特降中使賜臣羊酒米麩者載育生辰愴永懷於風木匪頒䟽寵叨厚施於雲天祇荷慈榮益深感悖臣中謝伏念臣晚生蓬蓽舊業罄

鹽適逢千載之期誤沐九重之眷禁涂入侍徒自愧於  
吹竽宥席延登曾蔑聞於借箸敢謂垂弧之旦更露出  
綍之恩勅使傳音私庭益耀併有廩庖之繼竊無塵露  
之裨此蓋伏遇皇帝陛下儀篤股肱寵優帷幄養賢而  
厚其禮兼侑大烹接下以通其情每推蕃錫俯旌初度  
內賁多儀頂踵甚微曷稱乾坤之造夙宵自厲但堅犬  
馬之忠臣無任

到鈞州謝表

罪辜山積當伏嚴誅恩量海涵獲從寬憲祇戴乾坤之

造曷勝犬馬之心臣

中謝

伏念臣稟資冥頑慮事闇淺

蚤以書生之末技誤蒙聖主之深知遍歷從班薦登幾  
地揣才非稱冒寵實多無制勝之籌何以助幄中之畫  
無解紛之略至於輟疆外之行不知國爾以忘家是謂  
食焉而怠事坐致煩言之噴亟宜顯戮之加敢冀睿慈  
曲憐孤蹟以嘗預萬機之論久接清光不忍為四裔之  
投俾諸善地此蓋伏遇皇帝陛下如天覆幬若日照臨

五教弼刑本躬行於舜德三風具訓終誕布於湯仁憫  
此微生與之末減臣敢不仰承善貸內滌非心杜門省  
愆儻識自新之路撫臆論報終捐不肖之身臣無任

賀殺獲敵主完顏亮表

天戈所指大敵摧鋒敵帳自隳渠魁授首共快邦讐之  
雪仰繫廟略之神捷奏九重歡騰四表臣中賀竊以北  
敵之難逾三十年南來之師號五百萬其貪殘固中國  
之所未有其暴戾有仁心之所不為豈期投筆以臨江

妄意揮戈而卻日一夕瓦解腹敗支披羣敵逃奔魄褫  
膽喪雖曰皇天之默鑒實由上聖之成謨方徐動於和  
鑿即坐收於疆土歷稽往謀度越前聞漢斬郅支第乘  
其無備唐擒頡利蓋得於已降猶足以揚昆山之威遂  
至於澡渭水之恥若今丕績亘古絕倫恭惟皇帝陛下  
天德清明聖圖廣大視民如子天下之所共知應敵以  
兵聖人之不得已膺信順之多助協修攘之本謀孟子  
言不嗜殺人齊焉能一高皇謂吾寧闔智項豈終強偉

此帝王之極功昭然仁義之明效臣自嬰大戾久闊清  
光幸存困躓之餘生得覩殊尤之慶事遙望天顏之喜  
阻拜舞以稱觴夙蒙帝力之深但謳歌而擊壤臣無任

車駕巡幸視師起居表

萬旅颺馳率連衡而遠討六飛雷動徐按轡以親行警  
蹕所臨輿情胥抃中謝臣聞天將以啟興邦之主世  
不能無多難之時必躬小勞斯辦大事然而文帝勞軍  
細柳終莫成功太宗立馬便橋又幾輕敵既動符于機



會宜功冠於古初恭惟皇帝陛下至德順民沈幾先物  
世祖身濟大業道本於柔憲皇能用忠謀斷歸於獨夙  
整時巡之馭大收恢復之勲百神恭扶萬福降輯臣方  
縻罪罟莫奉宸駒望屬車之清塵徒坐馳於禁路釐上  
帝之景命佇歸宅於神京臣無任

賀車駕巡幸視師回鑾表

天仗巡師茂壘止戈之烈帝車復路式弛行闕之居凡  
預見聞率同呼舞臣中賀恭惟皇帝陛下德配天地功

光祖宗仁覆下以無私雲行雨施武通神而不殺雷厲  
風飛比陳應敵之兵亟勦淪盟之詐出車命將方進討  
於中原按轡勞軍乃肅移於清蹕迨此還衡之始偉茲  
獻馘之多亂甚有苗不待七旬之格勇如徂莒真成一  
怒之安華夏均歡神人底豫臣戴盆自咎拱極彌勤獨  
效堯封祝我聖人之壽共歌周雅喜於王化之行臣無  
任

天中節賀表

五月為皋協應薰風之候一人有慶丕昭大電之符諸  
福川增衆心鼇忭臣中賀恭惟皇帝陛下功高復古道  
大無天舜舞兩階自致遠人之格湯羅一面率惟寬德  
之歸好生溥洽於民心得壽永膺於帝祉當誕彌之紀  
節宜錫羨之儲休自天申之受命長矣臣坐拘黜典述  
仰清光漢殿稱觴雖阻九賓之會堯雲在望但傾三祝  
之私臣無任

賀立皇太子表

臣某言恭觀五月二十八日手詔立皇太子者皇天輔  
德行赤制之昌圖聖子承休履青宮之正位涓辰授冊  
浹寓騰歡臣中賀竊以聖人無私心至公而神器定天  
下有大本豫建則羣心歸必九重躬獨斷之明斯萬國  
仰元良之正肇稱茂典凡屬熙朝恭惟皇帝陛下其仁  
如天以古為鑑受奉元之神筴以莫不增詒翼子之燕  
謀其寧惟永丕闡垂裳之治聿嚴主鬯之求出自淵衷  
立茲儲極撫軍監國豈惟分宵旰之憂繼體守文將使

荷宗祧之託仰窺宸慮上合天心臣久在黜科側聆溫  
詔聖盡倫王盡制莫窮盛德之光海重潤星重輝徒効  
輿人之頌臣無任

賀皇帝登極表

臣某言恭覩六月十一日太上皇帝詔書皇帝陛下登  
寶位者王假有家決大謀而內禪帝出乎震嗣洪業以  
丕承三靈扶不拔之基億載荷無疆之壯臣中賀臣聞  
藝祖膺圖肇造卜年過於成周上皇撥亂中興受命同

乎光武屬久勤於幾務思退養於壽康乃睠元良肆登  
大寶傳歸於子而尊歸於父兩全授受之光順助者天  
而信助者人交贊纂承之慶本宸謀之素定占鼎祚之  
彌昌恭惟皇帝陛下資稟聖神行全仁孝言底可績邁  
虞舜之聰明道得其傳體文王之淵懿自敷臨於國本  
知久繫於民心親承帝咨亟踐天位堯言誕布已明黃  
屋之非心漢歷重開人見赤符之有記豈止奉燕詔之  
本志遂將收恢復之成功臣屏伏遐方欣聞曠舉六龍

在御雖莫効於雲從八表同歡但率先於獸舞臣無任  
賀太上皇帝傳位表

臣某言恭覩六月十一日詔書皇太子即皇帝位皇帝  
陛下稱太上皇帝退處德壽宮者授位儲闈躬發非常  
之斷頤神廣內坐膺難老之符千古有光萬邦無斁臣  
中賀  
恭惟太上皇帝陛下功深育物道極昭天攬權綱  
者三十六年自濟艱難之業上符瑞者數千百所每懷  
損抑之心具聖人之成能斯大德之得壽舉此神器授

之皇儲咨舜帝之四聰詎煩師錫陋唐家之三遜獨出  
誠心超然為脫屣之圖了不待持龜之決臣退于荒裔  
逢此盛明黃屋非心尚託堯天之庇玉卮上壽莫瞻漢  
殿之儀徒逖仰於清光願永膺於介福臣無任

賀今上皇帝上太上皇帝尊號表

臣某言伏覩六月二十九日詔書恭上太上皇帝尊號  
曰光堯壽聖太上皇帝者席慶膺圖嚴一人之大養歸  
尊報德建萬世之丕稱聲教所加旒倪胥抃臣中賀臣



聞聖人何加於孝惟純孝斯能篤於親大德必得其名  
非隆名無以稱其實考百王之甚盛具二美之為難赫  
若熙朝光于曠古恭惟皇帝陛下道繩祖武化輯人文  
受上帝之命而作君師家齊國治推哲王之心以事父  
母地察天明眷言踐阼之初宜示承顏之恪舉五日一  
朝之故事既肅展于誠心因九州四海之歡聲復丕揚  
於顯號歲儀穀旦奉冊殊庭發揮傳聖之休功昭假後  
天之睿算臣屬嬰宿負阻覲彌文雖蕩蕩無能名莫贊

譽堯之美然欣欣有喜色但知歌舜之深臣無任

賀太上皇帝冊尊號表

皇綱帝紀聿彰授聖之功天號人稱茂正歸尊之典禮  
行中禁歡浹外區臣中賀臣聞自古以來惟堯為大位  
傳于聖初非徇一人之私仁稟于天獨能高五帝之壽  
仰闕上哲卓冠前徽宜闡繹於闕休遂丕膺於顯冊恭  
惟光堯壽聖太上皇帝陛下道公無我功大難名雖撫  
運中興創業實同乎藝祖而戢兵盛治歷年幾及于仁

宗惟聖盡倫謂天與子灑噩布十行之札雍容辭萬乘  
之尊趨澹泊以頤神保康寧而介壽誕受鴻名之赫彌  
占鼎筮之長臣以臯戾之餘生當光華之復旦雖弗能  
鋪張盛德與二典以爭輝但相與請祝聖齡從三光而  
不老臣無任

會慶節賀表

負辰當陽方仰龍飛之聖觀璿告瑞適逢電繞之辰慶  
叶千齡歡均萬寓恭惟皇帝陛下重華協帝大德庇民

乘乾膺物覩之期受祖得世修之業統承邦慶大橫應  
兆以庚庚瑞紀聖生佳氣靄空而壽壽自廓總明之照  
有光初度之祥四海傾心戴聰明之時又三靈錫祚占  
福祿之日來臣頓冒清班常瞻睟表舜庭輯瑞雖阻覲  
於重瞳周雅揚休但深祈於萬壽臣無任

天中節賀表

握圖授聖有光揖遜之朝鳴社發祥復屆誕彌之月照  
臨所暨呼舞惟均臣中賀恭惟光堯壽聖太上皇帝陞

下道以損修福由謙受功成而不自處與世作程德大  
而無能名如天在上屬雷繞虹流之紀旦宜日升川至  
之叢休廣成子授以長生燕頤自得華封人介之眉壽  
永保無疆臣屏跡衡門馳神魏闕奉玉卮而稱萬歲未  
遑周行上金鑑以祝千秋徒深善頌臣無任

會慶節賀表

十月為陽迓天宗之降嘏一人有慶肇帝武之開祥運  
際勲華歡均普率臣中賀  
恭惟皇帝陛下位尊明兩德

峻登三地平天成行見復禹之迹父作子述固已廣文  
之聲當載震之熙辰洽維祺之善頌烽沈柝靜坐清北  
徼之塵松茂竹苞永保南山之壽既修德錫符之有素  
矧宜民受祿之方增臣偃伏巖阿傾瞻象魏仰太微之  
座稱觴莫綴於在廷詠天保之詩拜手但期於報上臣  
無任

歸常州謝任使居住表

羈臣負辜久逃司敗之誅睿主膺圖首沐蕩瑕之澤恩

光俯被感涕交流臣

中謝

伏念臣奮自諸生倚無他技

偶遭逢於盛旦獲振拔於滄塗臺閣十年寢冒近臣之

顯列雲天一札悉由太上之親除方贊幄中之籌適逢

疆外之變既不能肅將使命排難解紛又不能力奮兵

威誅暴除亂旋嬰大戾斥處彌年忽蒙曠蕩之恩返即

便安之地夫何幸會有此叨逾茲蓋伏遇皇帝陛下業

紹垂裳仁深弛咎天穹隆而在上廣覆無私日華曜以

宣明重光有赫方且棄瑕而用善未曾記過以忘功有

如玷缺之餘亦與龐鴻之渥臣敢不仰承休德益勵壯  
圖萬宇歸仁方戴龍飛之九五一心報上但同虎旅之  
三千臣無任

太上皇帝賀表

三綱正始燕嗣聖以詒謀四德修明登柔賢而儷極慶  
叢中壹歡浹外區臣中賀伏以唯聖盡倫道全則大自  
天惇典福備為難有如二帝之重輝竄謂千齡之永盛  
恭惟光堯壽聖太上皇帝陛下化由身率道與世隆高



德比於九皇超乎萬物廣愛刑于四海驩若一家緝儀  
交綯於禕楡大養益嚴於寢膳衍宮闈之介福固廟祏  
之洪基臣久矣違顏邈焉在野幸逢舜且仰日月之光  
華但賦周詩祝子孫之千億臣無任

今上皇帝賀表

皇明嗣服由五典之功昭婦順宜家見六宮之位正昕  
朝誕告薄海祗歡臣中臣聞堯以舜承尚觀嬪則任惟  
如嗣益播徽音昔皆曠千載以垂芳今乃萃一時而協

慶恭惟皇帝陛下德優治內孝篤寧親知天子之必有  
尊上遵嚴訓察家人之無攸遂旁叶吉占揆穀旦以裁  
儀啟椒風而迪化益煥權星之象永緜瓜瓞之休臣屏  
處窮閭欣聞渙號天高地厚方荷戴於隆恩國治家齊  
願揄揚於美化臣無任

上尊號表

天相丕圖一德撫興王之運君都顯號四方推戴上之  
誠茲冠代之鴻休實累朝之鉅典敢效叩闕之請輒忘

席藁之誅竊惟有道之君必得斯民之譽三代之王先  
令問備載於經七制之主有大功首稱其孝厥惟盛際  
尤屬熙辰恭惟皇帝陛下受命穆清躋民仁壽出震御  
千齡之旦乘離恢九聖之基奠禹鼎以再安戢周戈而  
不戰二星抗節歲通北國之驩六駝旋輿日侍東朝之  
養焗然文治揭在民謠厚澤浸乎八區太平登于二紀  
多儀且舉精意潛交黛邦三推奉盛於清廟景鐘九奏  
颺燎于園壇膺上帝之溥臨卜兆人之允賴仰占乾象

璿璣運而七政齊俯協坤靈玉燭調而百嘉茂凡茲著  
效不可殫論豈駿烈之彌崇尚丕稱之未建宜涓穀旦  
式舉舊章雖蕩蕩乎無能名莫贊譽堯之美然欣欣然  
有喜色但知歌舜之深臣等肄業儒宮觀光帝闕竊懷  
大願薦布需章不量草芥之微冀協冕旒之聽整皇輿  
而告廟行望翠華之旗受玉冊而臨朝即刊白玉之寶  
庶符輿論拱俟俞音臣等無任

牋

太上皇后賀牋

發號楓宸式嚴嘉禮騰芳椒極茂鬯重輝道化合乎兩  
儀懽聲翔乎八表臣中賀恭惟壽聖太上皇后殿下恩  
深母育德厚坤承躬岐下之勤勞共成王業廣周南之  
教化首穆邦風休功既底於家齊備福更資於婦事光  
昭發冊喜動鳴環臣身在寒鄉耳茲盛事仰唐虞之華  
旦彌切望雲歌任妣之徽音第同擊壤臣無任

今上皇后賀牋

入從龍樓久嚴婦道進登椒掖肇正坤元天作合以同  
休下聞風而率舞臣中賀恭惟皇后殿下藝該圖史德  
稱翬珩變彼令儀早承恩於魚貫僚茲昌運實附翼於  
龍飛果符夢月之殊祥式舉覩天之異禮助承顏於兩  
殿資聽治於六宮臣屏跡巖壑係心觀闕青規考制雖  
莫預於討論彤管流芳第竊形於歌詠臣無任

海陵集卷七

欽定四庫全書

海陵集卷八

宋 周麟之 撰

啟

見孫尚書啟

連年避地久鍾慕閤之情昔日磨門已遂識韓之願與  
聞末論大慰夙心有稽奉雉之趨猶覩登龍之列挽車  
而見永歎無欺懷刺而投復慚不敏恭惟某官南州望

重北斗名尊流道德之淵源蔚言談之林藪勁氣沮金石高義薄雲天智能海內無雙風華江左第一蚤歲掇兩科之選雄文起百代之衰翻汗簡於蘭臺四部之書畢讀演綸言於鳳閣五王之冊分占薦登喉舌之司屢鎮股肱之郡措紳聳聞其風采草木知畏其威名不虞盈篋之書未即覆甌之拜燕居自適清譽益高詠白傅之詩偃息香山之第舉晉公之酒優游綠野之堂佇膺宸命以趣歸當為蒼生而復起某斗筭小器樗櫟散材



叔殘編於煨燼之餘勵素志於飄零之後質非幼敏誤  
稱天上之麟名不速成孰謂人中之驥勉趨庭而學禮  
靳發策以決科時喜帶經而鋤豈效棄觚而歎不克終  
養遽興銜恤之哀僅存餘生恐墜傳家之訓永惟先德  
實荷深知固無千斛之求敢期作傳不受萬緡之獻尚  
冀請銘雖懷荼毒之悲每起巖瞻之念輒繼窺於數仞  
或沾丐於餘波牧豕而辱先君願佩澤中之戒取履而  
教孺子庶披圯上之書

見張侍郎啟

館鳴珂之里屢瞻軒蓋之光望列戟之門敢遙簪裾之  
後失百川於向若輕萬戶於識韓雖無蟠木之先游輒  
就景星之快覩恭惟某官文章司命吾道主盟氣儲海  
嶽之精學探天人之蘊詞鋒警銳字挾風霜志節孤高  
忠貫日月德望著東卿之後才華傾北斗之南棣萼聯  
輝桂林擢秀一門何盛七業俱興三虎之中人推其最  
怒八龍之列獨擅於無雙擴先覺以及人障未流而反

樸青藜下照早膺司典之華白首回翔久奉含香之奏  
逮分符于郡寄留執憲于臺綱權豪避御史之驄威譽  
落將軍之膽進持禮典擢在禁塗方期入贊於洪鈞遽  
乞就閒於真館石樓詩酒暫追居易之遊竹塢林泉毋  
傲希聲之隱允惟國器簡在帝衷屬寧親靖難之初必  
思耆德顧立政任人之本無越老成竚通帝夢之祥亟  
拜璽書之寵片言悟主行展盡於忠謀一字拔人冀獎  
成於士類某量幾夷隘性近柴愚和熊膽以助勤幼雖

有訓賣牛衣而自給長亦無聞空存希驥之心妄究獲  
麟之旨作賦漫窺於小小說經徒聽其磴磴效免曹刻  
鵠之工深虞類鶩授童子雕蟲之技或許升堂恥進足  
以趙起獨倚門而翫髀惟是東南之望士願見下風愧  
非淮海之俊人敢陪高論幸借吹噓之末俾承馨歆之  
餘雖枯柏豫章未有棟梁之器而桂芝參朮庶充藥物  
之資

代回福建提舉杜朝請到任啟

伏審光膺命綍遠服使軺攬轡登車塞帷視事恭惟某  
官憲章明習風績藹聞以彊敏之才更繁難之任卧琴  
堂而撫字遙蓮幕以優游擢從展驥之勞畀以莞山之  
寄立三等之資而定估悉掃弊源遵十二之法以便民  
即登課最行拜爾書之寵進陪夜席之前某卧疾里門  
坐馳旌節未遑修於慶牘先辱賁於珍題愧荷之深占  
言奚盡

代回賀臨安張待制啟

伏審拜命宸章陞華次對顯膺帝簡歡浹師言恭惟某  
官譽冠時髦智周物表以儒術飾史事以才業結主知  
出分轉漕之權輦車不絕入著尹京之效桴鼓稀鳴擿  
姦伏以如神典浩穰而為最兼師臣之重鎮並藹風猷  
登內閣之近班茂隆寵數即膺眷倚大展經綸顧惟哀  
朽之餘敢謂記存之厚尚稽修慶遽辱飛緘感頌之私  
敷陳罔既

代回舒守張朝奉啟

三年養疾屏伏田廬千里懷賢坐傾旌棨敢謂眷存之  
厚過形緘問之光荷遠賁於哀殘實內增於榮佩恭惟  
某官天資恬粹吏道循良世傳名父之謠人樂張君之  
政化移姦盜訟錮晝虛福被邊氓烽亭夜靜大才久試  
尚淹一鄣之乘溫詔俯頒行拜十行之寵某久嬰哀疾  
正闊風猷竚觀旌名之來即展慶書之禮其為瞻頌罔  
罄敷宣

上徽州胡提舉啟

締好高閔忝在乘龍之列叨恩別乘慙非展驥之材幸  
德蔭之可承庶官瘵之知免某官襟懷日月智略著龜  
才游刃以恢恢志凌霜而凜凜乘軺近服初褰賈父之  
帷剖竹藩方屢引買臣之綬宣布暫同於佩犢去思猶  
戒於翦棠乃眷近邦復煩舊德凝香森戟固治理之有  
餘增秩賜金諒詔音之匪晚某轍鱗乍奮牆面何知將  
竊庇以自存仍造官之相踵始佐黃堂之善治以樂溪  
山終依皂蓋之餘陰獲安屏軼清和在候嘯諾云初祈



妙葆於天倪益寵綏於帝簡

徽州鄭通判啟同官

大邑鳴琴嘗竊依於餘庇長途展驥乃獲佐於下風靜  
言締好之深采切詠仁之素某官望高邦獻識達政經  
磊落多才續由求之果藝周旋盛德貫夷惠之清和累  
種河陽之花初乘仲舉之座雍容嘯諾已藹著於權謠  
馳騁事功佇立登於要路某久違德宇幸綴官聯河漢  
已遙望星槎而阻闊蒹葭甚陋倚玉樹以增輝暑籥既

升薰風初屆冀眷調於公餗即茂對於寵光

回祁門知縣

乘仲舉之座深愧非才望河陽之花久聞善政居自慚  
於鷓退行喜覩於鳧飛某官藝了十人才魚數器擴高  
才於製錦觀小試於鳴絃百里將離尚屈大賢之用一  
鳴展驥佇登要路之津某猥以沉蹤濫分別乘陪嘯諾  
之餘暇祇懼素餐稽撫字之良勞敢忘善助未遑修問  
先辱陸音

除著作佐郎謝啟

鳴騶問政吏則不聞載筆承明讀吾未見因知小已之  
得失亦係大公之廢興竊惟著作之庭邃在圖書之府  
舊文所次有嚴石室之藏大雅為羣寶貯金閨之彥自  
官制肇興於晉魏顧史才孰繼於班張閣筆無成歎條  
章之未見上車不落嘲選任之式輕自非兼有三長之  
資何以與聞一代之典如某者蓬茅弱植巖穴窮栖免  
園漫守於家傳狗曲第慙於師授多聞匪約但同愚賈

之操金逆旅無依更類窮猿之失木曩陳末技濫竽周  
行糾教成均亦屢更於歲月讐書天祿徒坐費於丹鉛  
猥緣四戶之攝承遂以一鳴而斥去拙於謀食釜中徒  
怪其生魚素不瀆交門外何嫌於羅雀方虞委壑忽冒  
題輿曾坐席之未溫辱賜環之遽及大昕入對再瞻玉  
座之清光中祕延登復睹蓬山之舊觀此蓋伏遇某官  
才全國棟道正民彝已闢異端倡諸儒以六經之說方  
陳長策舉明主於三代之隆乃昭示於大公用旁招乎

衆俊遂令困躓亦預甄收東人可占已見璧才之聚大  
鈞所播敢忘國士之知

代七兄監酒謝湯漕啟

元禮通家風軫門關之舊趙文舉士誤推莞庫之材念  
器使之不遺實恩憐之有素愛忘若此報稱謂何伏念  
某樸樾凡資羈窮末緒詩禮誦過庭之訓箕裘承奕世  
之傳早逐宦遊繼參時難安能久事慕投筆之班趨要  
當立功想棄觚之介子屯遭戎旅綿歷歲時不能食肉

而飛焉能裹尸而死每効塞旗之力寧忘緩帶之風壯  
節未酬視飛鳶之欲墮初心已負歎畫虎之不成晚克  
志於儒規復冒恩於世賞自兜鍪而出益愧操修以鉛  
刀為銛尚圖淬勵妄冀雲津之躍遽纏風木之悲三釜  
及親已乖於素願一行作吏永効于微勞甘從俗以浮  
沉笑為官而拓落棲遲旅館殆同涸轍之鱗悵望舊山  
已作焚巢之鳥方大旆甫臨于近鎮顧孤蹤久困於窮  
途就拜車塵勉圖更攝思綈袍而戀戀曲荷記存御馬

馬以揚揚樂從驅策為貧而仕雖賤不辭舞醢甕之天  
方漸期於奮翼走麴車之道初敢意於流涎謬當權酌  
之司實係幹旋之計醉兵廚之百斛難繼高風給門下  
之三升濫霑微祿過將奚補恩實有歸此蓋伏遇某官  
履道廉平持心愷悌卓犖時材之冠嚴明世吏之師暴  
公子之威名素聞江海尹扶風之政譽久著朝廷茲惠  
一州甫逾半歲果膺褒璽復就使軺二千石之良能已  
觀往效十五城之重寄均被深仁致令猥瑣之資亦預

使令之列某敢不居勤職課靜察吏姦追楚客之獨醒  
戒宋人之不售永託帡幪之庇庶獲便安擔捐溝壑之  
身少酬知遇

代年節賀州府啟

千載一隆甲子起上元之運羣生咸遂青陽乘太族之  
和恭惟某官廉德表民英風秀世御兩轡而作屏聽千  
室之鳴絃屬三陽肇歲之初迎百福順時之吉即膺宸  
命前對寵靈某也久卧病痾阻修慶禮感璿璣之運益



歎哀慵望魔戟之光徒深馳頌

回常州周守啟

伏審光奉細書起臨近郡兩轡入境爭翻來暮之歌千  
室鳴絃已樂告新之政歡聲所暨譽望稱休恭惟某官  
德具將明才高牧御含香奏事嘗參重於民曹足食成  
軍亦屢將於使指仕無喜而已無愠清不濁而澄不清  
惟夙負於實能故卒歸於公選凜然森戟暫分劔井之  
寒光行矣賜環即泛畫溪之春色某披雲尚邈借潤非

遙惟公卧治之邦昔我羈栖之地言念松楸之壟獲託  
庇庥但同襦袴之民播為謠詠荷詔書之甚寵愧慶牘  
之何稽

回蔣龍圖啟

祇奉贊書濫司記注秉直筆於螭頭之下從屬車於豹  
尾之中方睿選之加嚴乃庸才之躡進濫吹已甚借潤  
為多恭惟某官閱辨洽聞老成重望五千卷撐腸之富  
無問不知三十年攬轡之英雖多益辨復屈臨于舊部

將歸踐於華涂李白不願萬戶侯歎未諧于識面卽公  
能為五雲體荷先辱於詔書

初除中書舍人回趙提官啟

祇奉睿除濫升詞掖三年假寵每慚潤色之非工一札  
疏恩誤謂代言之得體仰聆天獎欽荷主知亦惟載縱  
之英與有遊談之助恭惟某官心如冰鑑口有雌黃取  
友必端德自全於三益待人以約已蓋具於百能賁茲  
黃絹之辭勉以丹青之價高情邁俗好稱篤於金蘭妙

語噓枯報實慚于瓊玖

回張通判啟

華轍屈臨幸快景星之覩大編垂責恍驚明月之投念  
晚學之何知蒙高情之過予伏惟某官望傾時輩才配  
古人淵生珠而崖不枯殆英靈之天賦鶴在陰而子其  
和宜聲譽之日聞況能自以詩鳴所得不為俗絆有如  
妙作正足名家試窺筆下之波瀾可見胸中之丘壑陽  
春白雪和彌寡高山流水知亦希命奚奴而背錦囊計

篇章之甚富呼驥子而吟玉案喜格律之爭新某早識  
芝蘭舊鄰桑梓雖承顏之已後實託契之尤深聽遺音  
於三嘆之餘自慙俚耳誦佳句於百僚之上徒效游談  
回淮西張運使啟

伏審光奉宸綸肅將使指行軒所過殆同衣繡以還鄉  
習俗相諳不假褰帷而問事飛郵遠暨屬部歡呼恭惟  
某官妙手撥煩英姿拔俗才堪排難素韜武庫之甲兵  
志欲惠民方探藥囊之芝朮念淮右據川涂之要於江

南為屏蔽之區自當澄汰冗員少寬民力亦必撫寧他  
盜預戒邊虞況茲告后之嘉猷莫匪保邦之長策更期  
戮力倚俟成功慙慶牘之未遑辱謙光之遽及一書借  
寵已逾十部之賢千里馳情莫効雙瓊之報

海陵集卷八

欽定四庫全書

海陵集卷九

宋 周麟之 撰

啟

賀左相啟

伏審奉詔中宸舊庸上宰維能補袞久思山甫之歸若  
作和羹爰正傳巖之立消辰誕告率王祇歡竊以選賢  
雖以道觀命相莫非天啟大風著兆由帝夢以前知中

夜闋章豈人謀而後寤偉千載一隆之運煥三台齊色  
之符龜筮其從股肱有喜用真儒無敵於天下效固宜  
然惟吉士勩相我國家政繇此立恭惟某官道公母我  
量遠莫涯重任在躬伊尹先天民之覺博通當世伸舒  
有王佐之方更中外之顯勞際明良之亨會召從藩牧  
來翊政涂方一人總攬於權綱掃除宿弊欲二相彌綸  
於機務協贊豐功簡是傑材授之魁柄巖廊高拱豈惟  
天子之仰成沙路仰觀將見單于之却立某聳聞孚號



欣覩曠儀一氣之轉洪鈞已歸大造千秋而奉明主佇  
讚殊勲拊詠之私敷宣罔既

賀右相

伏審茂膺帝制峻陟台衡謝傅之量休休靡容高卧周  
公之鷁几几復喜遄歸大號渙行輿情孚說竊以抱道  
之大逢辰者難賈誼傷吞舟之魚莫能容已王褒美齧  
膝之駕要在得時惟安恬於命義而不顧其他則感會  
以精神而必見於用宜茲華旦有此舊臣恭惟某官上

所倚平人之彥聖義形于色凜然松柏之後凋德裕乃  
身粹若珪璋之特達頃叅大政未究遠猷十年湖海之  
心已之無愠千載風雲之會至此乃亨遂符霖雨之思  
亟正衮衣之拜望風從化已聞御史之減騶同日登庸  
復見開元之設饌其濫陪鸞鷺竦聽絲綸元首明而股  
肱良方歌盛事大厦成而燕雀賀共贊徽聲

賀知院

伏審肅膺中詔榮總上樞聖主之得賢臣允當盛旦文

事之有武備卓見全才寵播絲綸歡騰措胄竊以本朝  
分二柄之重宥府筦七兵之嚴宰路旁兼久矣事權之  
少損儒臣獨領令馬體貌之稱宗廟有憲邦之姿能專  
基命之寄恭惟某官道侔先覺學蘊壯猷當風雲千載  
之期有臺閣十年之望回翔天路翼乎威鳳之冲霄入  
贊廟謨沛若巨魚之縱壑茲踐機庭之長實為鼎席之  
階姑借重於本兵示有嚴於常武當周室戡干戈之後  
懿德是資得子房在帷幄之中成謀益固某與觀鼎貴

益竦巖瞻窺東壁之圖書舊叨殊遇望北辰之樞極方  
託餘暉并詠之私敷宣罔既

回洪帥折樞密啟

伏審光膺睿札易鎮雄藩洗南海之瘴氛旌旗動色挹  
西山之爽氣簪笏生輝條教一頒頌聲四洽恭惟某官  
忠謀衛社壯節雄邊家傳圯上之書力奮隆中之畧聽  
履星辰之上早分職於六卿運籌帷幄之中獨折衝於  
千里當雪霜之大摯凜松柏之後凋浩氣不衰老猶彌

勵晚遭逢乎公道聊偃息於上游卷雨飛雲坐嘯臨江  
之閣攀龍附鳳竚歸論道之庭夙仰英風與霑餘潤未  
諧望履徒欽北斗之一人首辱詔書若獲明珠之兼乘

又

祇膺睿札濫正綸闈方書笏以珥貂遂拜庭而壓角一  
人自擢知忠實之無他三歲為真示器名之不假顧此  
叨榮之甚厥因借潤之多恭惟某官德具元龜望高喬  
木聲名赫奕稱一代之龍門問學淵源渺千尋之玉海

以扶世尊民為己任以推賢揚善得士心事業不減古  
人品題便為佳士退惟孤陋幸及老成雖屢阻於拜塵  
諒陰蒙於推轂荊州未識固知萬戶之輕郇翰遽來徒  
仰五雲之妙

回孫尚書啟

伏審光奉溫綰寵還祕殿彌年奧滌不幾乎寶康瓠棄  
周鼎之嗟復且昭明乃復有游閭闔觀玉壺之意華纓  
所萃緩帶交歡恭惟某官百代宗儒三朝壽俊學能必

至水萬折而東之問靡不知龜千年而一聚當衆口鑠  
金而可畏顧匹夫懷璧以何辜大節不緇孤忠自白幽  
居無累超然藐姑射之山晚歲獨存歸若魯靈光之殿  
既上公車之奏果興宣室之思亟疏寵於寶符遂通班  
於清貫遙瞻漢閣何當曳太乙之青藜佇入秦關亦粗  
識真人之紫氣豈止聽履於星辰之上蓋將運籌於帷  
幄之中怪名節之未頌想高懷之頗鬱謝公不起顧其  
如蒼生何漢將有謀諒無踰老臣者大才當用清議所

歸某頃自膺門屢嘗奉履甚愧登龍之舊乃稽賀燕之  
恭執古禮以事公當下袁松之拜為先君而厚我忽垂  
荀勗之書仰服高情永懷善誘明珠照座莫酬蕙乘之  
珍妙筆驚人益壯五雲之體

回狀元啟

伏審親承聖問卓冠儒科方明主表章六經詳延天下  
之士以匹夫動寤萬乘灼見仁人之言臚唱傳呼俊躔  
竦慕伏惟狀元先輩器博用遠學成行尊以海涵地負



之才兼玉潔日光之操窮年待問手不停百家之編盛  
且決科筆獨掃千人之陣當明聖修潤色之業謂春秋  
為攬權之書誦語于庭豈止論天人之際正辭以對誠  
能明禮義之宗默契上心擢居前列在時論以為龍虎  
榜不愧盛名如道家所謂蓬萊山固宜平步某濫司史  
筆叨贊文衡仰睿鑒之天臨眩英辭之綺合鱣堂糾教  
素知國士之無雙桂殿呈書復見仙宗之第一

回第二人啟

伏審奉對楓宸策名鼎甲危言不顧遂痛革於秦拘大  
器難量詎恥居於王後直臣增氣公道有光伏惟某官  
六館舊人四川名士多文是富豈惟食雞跖之數千廣  
業不荒固已吞雲夢者八九以三冬積學之彥為萬里  
觀光之行奮揚孤忠入奉天對盡言無隱當宁為之改  
容下筆有神旁觀莫不縮手遂以朝陽之鳳亞於前列  
之龜行展高程立登要路某叨司載筆備數程書白袍  
紛紛坐閱人材之盛一士諤諤獨知王室之昌

回陳先輩啟

伏審獻藝龍墀蜚聲虎榜蓋魯史為經國之制能以心  
通而太丘有興門之孫詎非德報祖風不墜士論咸孚  
伏惟某人識抱龜長器韜玉潔軼材天賦素高吐鳳之  
辭與學家傳備究獲麟之旨惟三冬以足用遂一鳴而  
驚人定價文場毋慙王勃之後著鞭仕路勉效祖生之  
先某夙仰大門幸瞻英範較舉子踏槐之技已見絕塵  
閱飛仙折桂之游復觀妙手投珍甚寵溢美為慙

回荆南劉太尉啟

伏審渙寵三墀薰華二組升班尉府肇開鵠印之祥移  
牧通都益重虎符之寄絲綸誕布播胄交歡恭惟某官  
將畧無雙邊功第一蘊青萍之壯氣洞黃石之祕謀卻  
殺說禮敦詩真可作三軍之帥羊祜輕裘緩帶坐能折  
千里之衝惟盛德之能謙故竒勲之莫掩果膺中詔復  
鎮上游草木知名固威聲之舊矣旌旗動色想號令之  
凜然某夙仰英風與霑餘潤未諳望履徒斂北斗之一

人首辱詔書若獲明珠之兼乘

回越帥王尚書

拜命赤墀叨官青瑣閱過門之命令益懼無堪慕批勅  
之風流惟知自勉濫吹已甚推轂為誰恭惟某官德備  
韋弦器優盤錯有猷告后嘗陪夜席之深謀所至惠民  
屢飲春江之遺愛雖已引買臣之綬猶能揚季布之聲  
遂致輪囷猥加刻畫伐柯取則幸亦繼於芳塵剖鯉得  
書愧難酬於厚意

回狀元梁先輩

伏審奉楓宸之大對誦語數千題鴈塔之高名收科第  
一拾地芥得明經之效破天荒為平海之光賓臚宣傳  
士論交慶伏惟某人造道自得下筆有神俊氣橫秋見  
一鷲之直上辭源柱石障百川而東之茲陳乙夜之篇  
旋擢甲科之冠星槎可問雲路非遙某謬直禁林叨程  
儒藝拔茅連茹方觀多士之朋來志目中眉又見英才  
之角立

回狀元許先輩

伏審光奉宸詔顯膺魁擢自中興以來十策士皆至尊  
親拔其尤而首列之選三有官用故事屈居其次名雖  
少抑道則彌光伏惟某人問學海涵才華雲肆大門奏  
賦猶傳白雪之遺音再世騰芳復得青氈之舊物雖俯  
就詞人之目實同霑舉首之恩某備數鑿坡程材桂殿  
品題高下豈能盡合於衆心議論正平此獨親聞於天

語

回第三人丁先輩

伏審發策九重聯名三雋能落筆論士大夫之氣信不  
雷同非著鞭追古作者之文何由穎出盛年得志同閑  
增輝伏惟某人篤學起家清才邁俗文如江漢流萬折  
而赴於東俊若駉駉生十日而超其母果發揮於鴻藻  
遂參列於上游坐令故鄉頓起頽俗某程書邃殿拭目  
英辭三人必有師為歎老成之幾及一第猶溷子彌知  
大器之難量



回前宰執啟

玉堂賜札方被昭回之光丹宸疏恩遽陪宥密之命顧  
晚生之僥冒由先覺之獎成恭以某官英望素高老猷  
彌壯扶持邦祚紀麟閣之勲名振拔人才負龍門之鑒  
賞致使迂儒之蹟亦叨右府之聯猥荷謙光先貽明問  
望五雲之多處竊仰餘光荷雙鯉之遠臨難酬厚意蕭  
辰向肅良覲未期冀妙葆於沖襟用仰符于睿眷

賀宰執

勅敵叛盟致隳王畧大軍乘勝訖奮天誅坐收蓋世之  
勲仰見經邦之畧捷音遠暨與誦歡呼嘗聞兵貪者敗  
義者王師直為壯曲為老惟戰守之無定致反覆以不  
常忘二十年玉帛之歡遽生仇讐越數千里河山之阻  
致動干戈當敵騎之長驅賴廟謀之素定天子欲勞軍  
細柳聲震遐荒諸將皆擊楫中流氣吞大敵既我師之  
屢勝知彼衆之多離方茲虎視於藩籬兩淮震蕩忽爾  
刃交於胸腹一夕殲夷斯上天悔禍之延示中國有仁

之至邳支傳首乃揚大漢之威頡利就擒足凜太宗之  
恥若稽往謀允謂殊休恭惟某官識照元龜身扶大厦  
仲尼有文事有武備將復侵疆子房無智名無勇功自  
操勝算宜鈎衡之默運致烽柝之潛消上方樂得賢以  
立邦家之基公實善應變以成天下之務坐戡不制之  
敵行策非常之功某僻處偏州欣聞盛事竊仰風雲之  
會不勝燕雀之情一舉振先猷復見太平之代千秋奉  
明主但歌眉壽之詩

賀汪參政


伏審歸覲嚴宸入叅大政晉公討賊已光賜節之行汲  
黯在朝夫豈發蒙之比寵疏綸綍歡動縉紳恭惟某官  
名世上材憲邦全業孤高不倚屹若砥柱之立中流純  
白自將炯如清永之出大壑惟弗苟隨於時好故能自  
結於主知昨借重於臺綱暫宣明於王畧絳騶清道咸  
瞻憲簡之威玉帳臨戎屢奏師干之捷既期月而趣見  
不崇朝而峻遷僚舊聞風豈止百人之緩帶廟朝增勢

行觀千里之折衝某雖斥遠方尚叨餘庇託金蘭之末  
契實自登瀛懷燕雀之懼悚敢忘賀履

回莫子中謝中詞科

芝聯三秀每慕高門芥拾兩科復觀妙手人第窺其小  
小君益辦於多多豈惟吾道之有光益見後生之可畏  
伏惟某官器資玉潔學問海涵稽古二萬言本窮經而  
自得柱腹五千卷驚下筆之有神矧在名家夙稱盛事  
義方教子龍淵並躍於雲津綵服拜親瓊樹相望於桂

苑偉矣詞林之冠蔚為文社之光終日而獲十禽士素  
推其絕藝一舉而得雙虎已獨擅其奇功某濫厠儒宮  
猥參文鑑觀瀾於水難窮渤澥之洪流索馬以圖遂識  
渥洼之駿足



海陵集卷九

欽定四庫全書

集部

海陵集卷十一

詳校官庶吉士臣李如筠

主事臣呂雲棟覆勘

總校官編修臣王燕緒

校對官編修臣盧 澂

騰錄監生臣王爾照

欽定四庫全書

海陵集卷十

宋 周麟之 撰

啟

謝除正字

借明東壁常通問漢之津假翼南溟遂躡登瀛之步冒  
恩彌渥揣分奚堪竊以道原自天文炳于世漢收篇籍  
條奏者六百家唐聚圖書部分為八萬卷倡斯文之大



備俟有道之昌期或發自壁藏哦酒誥之脫簡或收於  
蠹朽得蘭臺之舊書然非敢向論其是非褚虞為之潤  
色則七略之富詎存於篇錄而四庫之盛曷著於開元  
鴻惟聖朝坐軒文柄公師論道翊神化之兩儀帝保亮  
天冠仙宗於三島雲開祕府海聚羣書汲冢補亡紛來  
異本羽陵暴蠹復見古文新章舊錄之蕪收私楮官牒  
之博采雖浩繁而有統亦訛謬以滋多亥豕馬馬因而  
愈誤魯魚帝虎久則失真儻未洽於見聞實每難乎是

正幼婦外孫之義豈孟德之能知女郎世子之名信鮑  
昭之弗悉知二首六身者僅明乎甲子讀三墳五典者  
未觀乎祈招矧後人之弗如誠下筆之多類自匪識該  
竒字義了奧篇誦三篋之亡書寫五行之逸志雲屏疏  
列女之傳烟閣補侍臣之圖則胸邑鼎銘孰知周刻嵩  
山竹策焉問漢儀興此校讐厥今遴選如某者質惟礪  
賤技等金昏習賦漫勞雖若屯毛而莫辨受才匪夙豈  
於之無而不差賴素業之未泯冀遺經之是究兩登科

目幸脫窮涂三八陶鎔遂超選調自糾成均之教即聯  
中秘之華竊粟甚優援毫奚補金根義著徒妄易於舊  
文石鼓年深豈盡明於缺劃每虞曠敗或玷寵光乃加  
重於品題俾就升於刊正雖性資魯鈍未詳雌霓之呼  
而歲月漸礪恐失秦山之篆夫何淺陋獲此僥踰此蓋  
伏遇某官經緯人文股肱帝室房謀杜斷持衆美効之  
君孔思周情以六經為之倡一德鎮廟堂之上八荒歸  
鑪錘之間曾是才凡亦叨器使某敢不讀其未見增所

不能觀道法於後先戴生成於終始青藜資照幸亟拜  
於餘光白虎論經喜親承於妙旨永惟恩紀誓以身酬

賀宰相轉官

伏審楓宸發冊鉉府旌庸方六龍御天首布風霆之大  
號而一相處內獨惟社稷之元勳帝命維新邦瞻益峻  
恭惟某官道先民覺言合帝謨堂堂一代之宗臣表表  
四朝之舊德眷深當宁嘗目之曰君子人名動殊方亦  
知其為真宰相蓋器兼於文武能身任於安危折遐衝

於樽俎之間定大議於笑談之頃自太上之恢帝業用  
為霖雨而濟蒼生宜聖皇之握乾符待以元龜而咨庶  
政初席纂承之慶亟頒優賚之恩萬七百戶平陽侯豈  
止陪敦於異數二十四考中書令自將永保於全名某  
久託大鈞欣聞休命屬杜門而擴處阻賀屢於趨承自  
憐轅下之駒昔叨陪於後乘尚冀轍中之鮒今獲轉於  
清波素籥在辰巖廊多暇願適鼎茵之節式閱宗社之

休

上張魏公

九重入侍舊窺彛鼎之勲一斥來歸行近麾幢之蔭故  
修竿牘用布腹心伏念某叢爾寒生愚無遠慮困躓皆  
其自取流離夫復何言尚思以小子之斐辭試浼于大  
人之靜聽嘗謂邊方無常盛之理惟知彼可以度宜朝  
廷有自彊之資不偷安乃能立事向溺講和之弊久忘  
應變之方軍政壞於休兵邦財耗於餽敵靡虞後患從  
徇卑詞使事頻煩適足以媒孽邊釁敵情謫詐遂至於

包藏禍心罷互市固已渝盟禁私渡從而生事洎覺姦  
鋒之露猶膠舊轍之循獨念庚辰之春嘗行朔漠之壤  
抗一時之詭辯知其將虎視以鷗張聆故老之謳吟附  
我必雲從而風靡銳然歸報初若駭聞旋預幄中之籌  
適逢疆外之變既責以整軍經武當効所長若使之奉  
幣乞憐雖勞奚補祇荷本兵之寄力陳制敵之謀詆之  
者謂弗能犯難以捐軀固知獲罪察之者謂不肯阿時  
而誤國或可原情大戾所櫻孤忠莫白茲幸真儒之復

用定成算以董六師是宜異域之聞風折遐衝而清萬里賴此心之未泯際吾道之將興恭惟某官德邁元龜望高喬木勲名暴耀垂竹帛已三十年知畧縱橫當貔貅之百萬衆以身用捨為國安危自承赤舄之還歸實慰蒼生之僊望況今以輔弼之舊復總洪樞於此以精神之彊盡護諸將必有長策共圖大功比聞降附之衆多已見規模之闊遠然而就敵好鬪故疆未歸正隆用事之臣各阻兵而相拒逆亮連衡之國或搖毒以自防



負秦雍之山河競欲抗蜀中之甲積青徐之糧械專圖  
過淮上之師卒徒雖創艾於南侵王旅尚稽留於北伐  
西師屢捷如陝西諸道猶困於力爭東海既隳若山東  
列城未聞於響應當得京兆而後建銳之勢順取淮陽  
而後破竹之計成庶能包舉於中原頗勝浪攻於他路  
苟非據要恐易於進而退則難更在謀長使取於初而  
終可保若議大舉須勞熟圖倘觀變以非宜姑待時而  
自治涵養士力俾各盡其知能審覘敵情務實得其要

領任將帥勿嫌於擢校廣貨儲無忽於憂民通內外以  
相須使卷舒而各當三時以講武事豈徒自固於本根  
一舉而奏奇勲端俟可乘之機會蓋本根立乃所以為  
進攻之漸若機會至又不當惟退守之拘願擇壯猷訖  
收洪烈某纍然罪廢偶此生還欣竊庇以安身阻望塵  
而趨拜方晉公討賊不能參彰義之行若漢將平戎猶  
可效燕然之勒輒伸管見少贊廟謨暖律正中機廷多  
暇願嗇天倪之粹永扶帝業之興

賀史叅政

伏審光奉宸綸進叅國柄方聖人有作乘六龍以御天  
宜君子得時見一鶚之直上郵傳沓至士論同歸恭惟  
某官道極資深識優致遠心如止水筆頭倒瀉於三江  
貌不勝衣胸次綽容於萬斛久結潛藩之眷蔚為舊學  
之師曾不累旬游更兩禁豈獨擅湧泉之思屢入告於  
嘉猷固嘗承跋燭之咨已與聞於大議亟躋三事協贊  
萬幾絕足追風千里僅同於歷塊亨衢附鳳一飛遂至

於沖天蓋聖賢合符而興故中外歆豔其寵佇日新於  
大化廓雲施於函生某頃歲聯科在朝接武佩金蘭之  
永好悵霄壤之殊涂自顧傷弓尚糾纏於罪罟今知涸  
轍將沐浴於恩波

賀左相除特進

伏審堯庭奉冊資上相之總儀漢札褒勲錫中宸之孚  
號進陟文階之冠益隆揆路之瞻凡在挺鎔舉深并詠  
恭惟某官功熙帝載道暢人謀嶽立清朝身作明堂之

一柱斗斟元氣坐應秦階之六符外恢闢國之圖中懋  
致君之業太上皇脫屣萬乘助成付託之公今天子承  
顏兩宮協濟顯揚之美肇稱濶典丕建鴻名獨高秉禮  
之勤首賁懋官之渥因之曰使聖人壽有光鏤玉之文  
繇是而為帝者師即正面槐之位某銜恩有素望屢彌  
賒欣聞大厦之成同於賀燕尚冀餘波之被活此涸鱗

賀右相

伏審賜環趣覲歸袞延登周公東征三年復佐興王之

業名伯日關百里久懷舊德之臣坯冶一陶頌聲四合  
竊以當今之大患莫若有北之疆鄰其并吞兩國則甚  
於漢之匈奴其蹂躪中原則過於唐之突厥雖三尺之  
屢試訖萬全之罕聞定信好於亶存之時由取予一如  
其約懷疑謀於亮斃之後致進退兩失其機追咎前年  
之冬反貽今日之害既不能席可乘之勢命偏師以躡  
卒徒之奔又不能明弗殺之恩示大體以延使客之至  
汨於羣議成此近憂尚敦睦者徒徇乎卑詞厚幣而遑

卹其它專進取者惟志乎畧地攻城而靡圖其後稱藩  
或憚於屈已擣壘或訾其貪功頃雖通紇石之書茲又  
狃符離之役欲議和則權不在我恐方枘之愈難諧欲  
言戰則力不能支念覆車之深可戒顧秋防之甚迫知  
肝食之靡寧徒重吾九重之憂未聞有一定之計語帖  
攝而事不決類同轅下之局駒制搶攘而跡愈多何異  
圈中之鬪獸盍恢遠畧預遏遐衝惟堅於守險以自持  
必急若救焚而乃可奈此責軍之後纍然棄甲之餘糧

儲煨燼於極邊器械散亡於中野淮上之藩籬多缺江南之根本益虛民拊摩之不暇而又困於輸財士招徠之已窮而恐難於禦敵於此欲內修外攘之並舉真可謂夏夏乎其難哉每相與夙興夜寐而深思未嘗不規然自失也賴有濟時之相來施治國之方恭惟某官氣粹函三道該絕四國有人而外夷服賢於秦之長城心無事而羣下安智若禹之行水蓋聖君方乘運而奮知良佐乃為時而生況頃服於冢司已備陳於長算人



咸嗟去國之久我獨念得君之深且駕追鋒就膺闕袞  
太叔能斷大事夙有契於淵衷丙吉不道前功今益彰  
於盛德煥若景星之復見廓焉沴氣之潛消惟揆路之  
迭居若高才之少屈豈其兼文武之兩器不害乎左為  
虺右為伊自非秉忠嘉之心蓋難乎前相堯後相舜行  
究經綸之業茂凝久大之勲某嬰此宿愆昧乎當務念  
忠臣之在畝畝不敢忘君矧弟子之於門牆有如知己  
輒露管蠡之見少裨帷幄之籌願啟迪於宸心力主張

於國是定規模期於不變審命令戒其多遷謂中興當  
用實才我則棄瑕而錄善謂上策莫如自治我則固本  
以圖全惟處謀於不和不戰之間必收效于可戰可和  
之際能研幾以成務庶轉敗而為功毋忽焉以腐儒之  
常談視之誠為此而天下之能事畢矣芻言甚陋燕賀  
彌深

賀洪周樞

伏審晉膺寶札升貳鴻樞方宣王興六月之師念飭戎

之是急以吉甫為萬邦之憲資處內之惟賢右府得入  
中華增勢恭惟某官業傳忠孝學洞經權搗文如韓信  
之用兵多多益辦論事若馬周之切理纒纒可聽蚤參  
豹尾之聯再上鼇頭之直高文大冊久矣播敷悍卒武  
夫聞之感涕力贊修攘之議延登宥密之司造膝一言  
折衝萬里謀猷胥契始知頗牧之在禁林方畧自明馬  
問孫吳之有兵法將坐恢於疆土即正席於鈞衡某夙  
荷知音忻聞出綍昔聯簪素契久佩於斷金今隔壤霄

喜何勝於緩帶

賀周叅政

伏審光奉宸綸進叅國柄方周宣復古資處內之惟賢  
而汲黯在朝豈發蒙之可比正人獲用輿論知歸恭惟  
某官六館舊人四科全哲襟懷甚廓有同萬頃之汪汪  
議論不阿自勝千人之唯唯雖踐揚于中外不罣礙於  
去來屬此六龍之御天俄然一鶚之直上入陪邦政協  
贊廟謨定知不期月之間將立在鈞衡之右某內慙破

甌久困飄萍所幸居鄭公之鄉密依鉅庀庶幾入和氏  
之肆永託餘輝

任使居住謝宰相

臯斥無堪已甘沒齒恩容自便獲返故棲蠢惟枯枿之  
萌實自大鈞之播伏念某才疎少與命蹇數竒鉛槧發  
身每愧吹竽之濫軒裳冒寵不知據蒞之危竟以罪行  
累茲歲易十年臺閣恍驚昨夢之非千里江山兀抱羈  
人之感百罹所絆九死為鄰忽蒙曠蕩之恩返即便安

之地訪故園之松菊復得鉏荒褰舊服之衣冠尚期刮  
垢此蓋伏遇某官天材山嶷公道砥平感會風雲扶黃  
屋九天之上調和鼎鼐活蒼生四海之中致使陸沈亦  
叨春施某敢不內懲玷缺仰託陶鎔倘使愚使過之弗  
遺則成始成終之可待白圭有訓詎忘三復之心黃雀  
何知尚報再生之德

賀湯左相

伏審光踐泰階寵還魁柄仲虺嘗為湯左相名高作誥

之初蕭何復以漢宗臣位冠論功之首郵傳所暨爵躍  
惟均竊謂負異材者因天佑而生圖大勲者非衆謀所  
及觀自古君臣之會遇考當時事業之規模得賢立邦  
甚至或形於夢卜運籌合上意了不待於著龜迨末俗  
之橫流致淳風之掃地公道安在用一人則毀譽交興  
謀夫孔多詢衆口則酸鹹異嗜羽沈舟而可懼道築室  
以何尤非聖人躬獨斷之神忠邪曷辨況天下有自然  
之理利害甚明由來一德之沖融安取衆言之殺亂若

光武之復炎祚但推赤心若憲宗之成恭功靡惑羣議  
然後識正臣之表表於焉致忠烈之堯堯孰能寤萬乘  
而轉大謀斯可綏四方而惠中國恭惟某官器涵七澤  
材挽萬牛德量汪然人知其澄不清清不濁才猷卓爾  
我歎其鑽彌堅仰彌高自從結綬以登畿直至秉鈞而  
當軸凡朝廷之禮樂法度問靡不知在侍從之獻納論  
思言皆可復力啟勲華之運身更旦奭之官出處何嫌  
徒笑虬蟄之撼樹飛潛自得不妨鸞鳳之冲霄果大慰



於羣心遂再居於上宰歷考本朝之故事備觀當世之  
偉人曾未有七閱歲華四登揆路兩宮眷注如應龍之  
結卿雲萬宇傾瞻如大厦之倚文梓宜確持於國是致  
坐弭於邊衝金石不渝風波自息願恢萬世之長策更  
起一王之新功念人材之衰少則務愛養以成其能究  
國用之耗虛則審取予以革其弊惟忠厚可以變士風  
之媮薄惟安詳可以正法令之紛更尚當選吏卹民戒  
州縣之培克自此實邊固圉息兵農之破傷永綏南北

之含生共享邦家之盛福某迹淪老圃心係師門素荷  
賞音每慙呼鼠以為璞近蒙報札復愧抵壘而用金聞  
廷冊之游頌仰巖瞻之益峻頡頏自喜莫陪賀燕之趨  
觥觥何辜尚冀喘牛之問

賀張右相

伏審白麻申命黃髮奮庸湯非伊尹不能興爰嘉秉鉞  
之助魯用仲尼安得削復喜侵疆之歸綸緯誕敷胄紳  
交抃竊以辦天下之事必須求天下之才當聖人之興

固自有聖人之耦念作楫為霖之夢斷悵耕野釣渭之  
風衰何君臣相遇之甚難蓋文武兼資者實鮮如周吉  
甫維以此而憲萬邦若魯僖公允能之而屈羣醜自兵  
農之業異致將相之途分山東山西之才固已別其自  
出閫內閫外之事從而了不相關孰知七德之原俱繫  
萬民之命張子房身在帷幄決勝無前諸葛亮起於草  
廬成謀已具或臨敵而有投壺之暇或善兵而無跨馬  
之勞謀元帥者僅得之說禮敦詩號丞相者間使之率

師討賊有如盛旦卓見全材恭惟某官學有壯猷忠無  
貳慮夙負平戎之志誓不與此賊俱生久操活國之方  
顧豈肯因人成事頃位秉鈞之次嘗分督戰之權號令  
肅將軍之營威名落邊鄙之膽三十年安於靜退公其  
如蒼生何百萬衆自我卷舒今無踰老臣者果副軍民  
之望復薰袞鉞之司造膝一言天子為之動色折衝千  
里鄰國不敢加兵茲就拜於台階實寵還於舊物廷中  
鵷鷺孰為曩日之翹材帳下虎貔尚有當年之壯士願

蒐羅穎異之傑更選練驍雄之兵收一代之賢豪毋使埋光而鏟采蓄三年之義勇以須保大而定功比聞敵勢之漸衰深痛民財之已屈設若定通和之議尤宜思固圉之謀謂江淮之田萊多荒當從趙充國留屯之便謂宣潤之弩手可募當舉李衛公戍守之宜勿云機會之不來要是功名之終在觀賢人可大之業卜宗社無疆之休某邈在巖栖勤於斗仰謂孺子可教也累伸跪履之恭見長者何後乎每恨登門之晚茲竦聞於渙號

方仰託於洪鈞一舉復土疆佇俟竒勲之立千秋奉明  
主益祈純嘏之熙

海陵集卷十

欽定四庫全書

海陵集卷十一

宋 周麟之 撰

內制

立皇子詔

朕荷天右序承列聖之丕業思所以垂裕於後夙夜不敢康寧永惟本支之重強固王室親親尚賢厥有古義普安郡王藝祖皇帝七世孫也自幼鞠于宮闈巍然不



羣聰哲端重閭義有立克于宗藩歷年滋多厥德用茂  
望實之懿中外所聞朕將考禮正名昭示天下立愛之  
道始于家邦自古帝王以此明人倫而厚風俗者也稽  
考前憲非朕敢私其以壽皇為皇子改賜名壽皇

皇太后慶壽詔

朕恢宗孝治槩迪民彝考立教之經親其親而為大推  
廣恩之道老吾老以及人方奉東朝之尊以光南面之  
履躬循至行日對慈顏侍膳問安靡違以溫清備物博

施期展于愛欽當歲籥之肇新欣鴻算之方永就諏元  
吉祗闡曠儀介壽稱觴侈萬年之景貺示民錫類洽四  
表之歡心爰酌邦條式敷惠澤皇太后仁德天祐聖壽  
無疆新歲八十朕於宮中行慶賀之禮當與普天同慶  
使為子者同樂以致其養居鄉者尚齒而達於尊文母  
思齊遂及古人之無斁魯君燕喜亦惟庶士之咸宜咨  
爾多方體予至意

賢良詔

昔漢設賢科欲聞大道之要唐闡制舉以得非常之才  
沿及本朝參用前憲故所得多天下豪傑之士而所言  
皆國家治亂之端其在當時豈云小補朕自紹履休運  
旁招俊能圖治功者逾三十年猶懼有闕下郡國者已  
八九詔未見其人屬當大比之期敢廢詳延之舉凡茲  
邇列各為明揚俾裒然而造廷將諏爾以當務必崇  
論竑議可行於今庶幾博問遐觀無愧於古

郊祀赦文

朕欽紹慶基肅遵昭式謂因天事天而因地事地有丘  
澤之合祠惟以聖繼聖而以明繼明宜祖宗之並侑每  
躬三歲之祀茂輯百神之釐茲益勵精更思圖乂體覆  
載無私之德廓示大公奉燕詒有永之謀丕釐庶政中  
外闔懌顯幽統和靈臺申偃伯之占砥路息鳴桴之警  
象載昭察甫田登成既膺眷佑之休當極齊明之報是  
用胥飾鸞路涓熙紫壇斂帝籍以供粢盛裁天歌以序  
金石祗見恭館裸將太宮遂迎景至之長載歲郊禋之

吉大宗祈而燕饗嚴陟配以延釐實俎膳膏旅令芳之  
嘉薦展詩應律鏘皦繹之和聲精意洞乎九垓祥光襲  
乎五瑞清明邇矣事既底於備成福履綏之美敢矜於  
再鄉誕受函蒙之祉溥施曠蕩之恩可大赦天下於戲  
馨香感于神明哀對一純之祐恩膏洽乎黎庶丕轄四  
極之熙尚賴輔弼同寅官師率職協亮有邦之采永恢  
長世之圖

御札

朕宅天休命纂國丕圖永惟燕翼之謀允重欽柴之祭  
自紹開于景運累謁款于熙壇祇荷博臨益恢隆施五  
兵不試既茂迪于民康百穀用成亦屢書于歲有宜候  
迎陽之旦載躬類帝之禋合鏘玉之和聲備潔粢之令  
薦庶申吉報仰達精誠資肸飾于上儀覬函蒙于多祉  
特敷大號明戒先期朕以今年十一月二十三日有事  
于南郊咨爾攸司各揚厥職相予肆祀罔或不恭

賜崇慶軍官吏軍民僧道耆壽等勅書

朕以士術席慶皇支庀司宗事久賴董齊之力率歸振厚之風爰錄顯勞遂陞齊鉞以彼樂土為之价藩既大號之播敷諒羣情之交慰

賜南平王李天祚歷日勅書

朕協用五紀底綏四方當歲事之嗣興必人時之欽授爰頒新歷式寵外藩其恪守於世封以懋經於邦務今賜卿歷日一卷至可領也

賜安慶軍官吏軍民僧道耆壽等勅書

朕以士籤皇屬近支戚藩英望典司宗事更閱歲勞爰  
錫命于齊壇俾建旄于鉅鎮諒聞廷渙式慰民瞻今特  
授士籤安慶軍節度使

賜南平王李天祚加恩制詔

朕寅承帝饗翕受神釐禮有朕膳恩均遐邇眷時藩服  
為我世臣特頒綸渙之章用致篚將之實宜祇眷渥益  
懋忠勤

內制



除楊存中少師制

門下總千廬而為衛式隆上將之元班九棘以在朝允  
重孤卿之冠睽時宿望祇扈巖除爰稽崇德之儀用畀  
疇庸之典誕敷褒冊孚告治廷少傅楊存中義槩傳家  
忠謀許國自筮迹風雲之會嘗策勲帶礪之盟晉臣萃  
美於一門蓋本戎昭之緒漢將聯華於三組亦惟世載  
之承夙提徽道之師內壯宸居之衛紀綱七萃不違李  
法之嚴錯綜五權自得姜韜之祕賴握兵而寢久嘉積

閱以彌深念當偃革之期思謹勸功之式惟邊陲徹警  
閭閻無萬戶之封故歲月序勞將帥有十年之賞矧重  
臣之兼領宜徽數之申頒夏篆建壇進陟維師之亞駢  
旄導節益彰制閩之雄增采戶以陪敦疊恩章而寵拜  
於戲修和有夏文王資禦侮之臣肇敏戎公召虎佐興  
衰之畧能助迪於彛教斯對揚於王休彌勵壯猶永綏  
多祉可

除沈該特進制

門下朕欽承景祚紹闡彌文敬奕世之璇源昭若慶圖  
之揭述詒孫之寶範坦然明訓之垂繫鉅典之交修賴  
元臣之董正誕敷制縉孚告廷紳銀青光祿大夫守尚  
書左僕射沈該才高而智周器博而用遠推十翼以研  
道妙深窮理物之幾陳五利以邕人和首贊休兵之策  
迨敷求於時望旋進秉以國成立齡持美効之君雖善  
謀而靡恃魏相總職稱其上非故事而不行圖回大政  
之餘典領羣儒之作自藝祖恢拓天統嘗叅著於本支

及裕陵丕顯聖謨亦具存於疊矩併加裒次汔用備成  
上憲赤文彪列星潢之派旁搜金匱彙分雲漢之章並  
躬覽於昕筵各安寧於禁宇允協三靈之喜重宣一代  
之光惟祖宗積累之休幸發揮於盛旦皆輔相經綸之  
助當褒顯於成勞沓進崇階用申特禮載衍爰田之賦  
益增揆路之華於戲披皇圖而稽帝文若睹龜龍之祕  
穆天緯而經國體尚資鼎彝之和勉迪令猷共彰洪業

可

除皇叔士衍特授崇慶軍節度使

門下立愛而始家邦莫尚敦宗之懿同姓以鎮天下尤  
嚴制閫之雄睠我近支久司屬籍宜序勞而進律用敦  
號以揚廷皇叔保寧軍承宣使知西外宗正事士衍體  
備中和才高肅又作善而心最樂挺有祖風好文而識  
不羣鬱為宗傑洊被展親之渥分提糾族之權躬承內  
睦之恩宣猷於外累閱終更之秩率職如初穆然信厚  
之成孚嘉爾訓齊之甚力迺疇俊望遂峻徽章六纛多

儀趣領少府之節十連寵寄畀總元戎之麾加爵邑之  
新封示親賢之異數於戲周以大宗維翰兼彼价藩漢  
雖支庶畢侯矧予族老圖壯本根之輔助成形勢之彊  
勉服令猷益綏蕃祉可

除湯思退特授左正奉大夫制

門下丕后繼前人之志篤成烈而作孚先大臣倡當代  
之文闡舊章而裁義類考百王之懿範嚴萬世之信書  
爰嘉次輔之英茂輯先猷之懿既助揚於達孝宜褒答

於殊勞咨爾在廷聽予敷號左通奉大夫尚書右僕射  
湯思退材全而能鉅量遠而器閎高明道乎中庸發為  
經世之學德業志乎久大僉曰立邦之賢迨進秉於國  
均彌燮和於天緯同心以輔予政職有領而咸修善斷  
以濟其謀功不言而自著凡經國贊元之用惟重規疊  
矩之循朕仰徽考之烈光紹累朝之熙洽深仁厚澤結  
四表之歡心釀化懿綱邁三皇之選武纂斯大典繫我  
鴻儒馬遷放失舊聞遂致科條之備韓愈增修前錄又

加詮次之精鑑奏篇而愴思襲延閣以寅奉允協羹牆  
之念繼序不忘載稽筆削之勤懋功惟賞進宗階之二  
等陪采戶之多畬茲為至公併示優寵於戲文謨丕顯  
若日月之光四方周道復明似春秋之大一統成予遵  
制之美賴爾襲經之傳益勵交修永眎燕翼可

沈該加食邑制

門下萬物本乎天義尚精禋之報五經重於祭恩先惠  
饑之敷朕祗適燕謀肅稱嚴祀登大糖於寧神之宇致



高煙於類帝之丘觀熙事之涓成賴元臣之秉禮迨錫  
饗承之祐首稽商賚之章誕告羣工丕敷顯冊特進尚  
書左僕射沈該瞻智周物全材憲邦讀易陳謨頤義曉  
天人之際定議固好仁風孚南北之民自晉接於台衡  
能鼎新於政紀百度惟正普陶簫韶之和三年有成復  
見豆籩之飭方秩文於大祭實領使於先期崇壇八觚  
儼陪陟降之序美樂六變具奏翕純之音柴燎升而雲  
杳冥靈游位而星錯落惟顯相有肅雝之助致休嘉多

碑隱之符享洽誠陳事昭福舉乃增封於采戶仍衍食  
於蓄畬式彰邦教之隆併示神釐之貺於戲聖人為能  
饗帝敢忘奉若之誠宰相所以代天共謹時幾之戒益  
恢茂烈永佐昌圖可

除楊存中加食邑制

門下朕穆卜天正具嚴帝禋參周典之一純二精昭饗  
承於上象倣漢儀之千乘萬騎肅屯衛於中營惟時首  
棘之臣扈我屬車之蹕靈祠拜貺渙號疏恩少師寧遠

軍節度使楊存中識洞五權義循七德智能自奮屢陳  
頗牧之功方畧如神匪泥孫吳之學被以三孤之黻冕  
總吾七萃之紀綱比協康年恭修禋祀倚號師以禦侮  
助寢威而展容路寢齋居之初董千廬而密護甘泉法  
駕之內按五仗以齊驅沆熙典之備成與福疇之敷錫  
載陪多邑之賦式廣大封之仁於戲多績紀于太常備  
見勲勞之著惠術行於餽俎益彰政事之均服我寵光  
共茲純嘏可

吳益加食邑制

門下祝嘏以降上神事莫嚴於帝饗賀慶以親異姓禮  
具著於邦彛朕習卜歲祥欽修郊類嘉時協贊之懿與  
有趨承之勞爰告治廷誕揚褒律保康軍節度使開府  
儀同三司充萬壽觀使吳益器範閎凝材猷膚敏飭已  
以謙居靡椒房之恃奉朝惟恪每聯槐位之趨善慶光  
乎一門英風表於四姓會茲景至對越天儀供元純以  
効功方資予內德之茂握齋旒而陪祀有若爾同支之

良矧蕪領於祕祠復從行於靈時欽柴已事徹俎均釐  
載敦井賦之腴申行戶祖之實式光乃服用溥吾恩於  
戲上帝惟下土之臨朕敢專於祉福興王有外戚之助  
汝母替於寅恭共對靈休往圖慶譽可

普安郡王加食邑制

門下朕潔粢酌之具嚴郊宗之祠象載垂光仰日星之  
明朗神祇安坐聽鐘石之昭融惟歆馨顧德之潛交乃  
降嘏產祥之並貺念宗藩之有相宜祭福之爰轄具諄

朝倫式敬贊冊檢校少保常德軍節度使普安郡王器  
資凝重襟量粹夷學舉六經每篤藝文之好才追二獻  
更勤禮樂之修自啟宇以疏封能奉朝而率履閭制導  
駢旒之節官儀聯夏篆之車屬天元之上辰助帝饗之  
能事葱珩有度恪陪鳴玉之趨桂酒其芬參侑薦匏之  
酌儼若卯階之登降訖茲辰牡之備陳嘉爾賢勞序之  
慶典斥爰田而行賦示惠餼以均釐於戲神嘉虞而申  
貳觴允有肅雝之賴澤汪濊而輯萬國敢遺敦睦之恩

共對靈休永綏吉祿可

除皇叔士衍加食邑制

門下朕鳴玉鸞于郊被龍卷以祭大音融洽嘉廣樂之  
四陳休氣晏溫邁神光之三燭哀對高靈之祐沛施羣  
辟之恩矧在懿親宜加褒律皇叔崇慶軍節度使知西  
外宗正事天水郡開國侯食邑一千三百戶食實封二  
百戶士衍賦資穎悟植德溫恭伯仲承芳韞有棣華之  
慶親賢著望信多麟趾之風自分糾于宗盟旋進膺于

閭制追敷裡賚祇協典彛雖清廟執籩莫預六旒之列  
而大廷輯瑞當從五玉之封載衍腴租式彰惠術於戲  
堯親九族德蓋自於克明漢秩百神福靡矜於專鄉往  
祇猷訓益迓寵靈可

除皇叔士籤安慶軍節度使加食邑制

門下修德固宗允賴价藩之助勵賢予祿式嚴帥節之  
頒粵有近支久分隆寄爰加制閭之命誕布告廷之章  
皇叔定江軍承宣使同知大宗正事士籤令德韜和英



姿稟粹身得用曩之善識推閱理之多父祖積仁世享  
真王之履弟昆聯事叅釐屬籍之司豈惟增華萼之輝  
固已厚本根之庇自糾宗於京輔迨今八年當典祀於  
濮園亦既再歲宜考屢書之績遂膺明陟之科并鉞參  
旗庸峻十連之授金枝玉葉益隆九戩之瞻仍舊爵於  
通侯衍新畬於多邑斯顯訓齊之效並申敦敘之恩於  
戲周建懿親倚作干城之重漢封同姓輔成磐石之安  
尚懋汝猷以承予獎可

除劉錡加食邑制

門下朕就陽而兆於郊作樂以薦之帝觀干戚之舞而  
知武事道固備於弛張聽鼓鞶之聲而思將臣恩豈殊  
於中外爰均祭惠式渙褒綸太尉武泰軍節度使知荆  
南軍府事劉錡身蹈儒規學探世畧臨戎之機好整暇  
多算無遺為將之道能柔剛有功不伐屢策勲於盟府  
久席寵于齋壇鵠印本兵尚倚威名之壯虎符作鎮益  
嘉信義之孚比展稷容肆敷鴻祐乃陪敦於井賦俾增

重於戎致於戲寧神得四表之心朕不忘于固圉歸朕  
交諸侯之福爾毋怠于尊王思勉壯猷對揚休命可

除李顯忠加食邑制

門下朕闔侯景之門而躬祀事集禮神之圃而擁靈休  
髦士奉璋莫匪秉文之懿虎臣持節蓋多承德之恭爰  
舉豐章用疇壯畧寧國軍節度使充殿前司選鋒軍統  
制李顯忠智優排難勇擅冠軍衽革顏行素號萬人之  
敵韜弦徽道分提七萃之師方一純祗薦於壇陔以六

引備陳於仗衛軍裝有肅既安黃道之行蹕路無譁遂  
訖紫營之享洎均釐而惠下乃進律以旌勞復舊聯於  
廂部之華衍新渥於爰田之賦式遵彛矩併示優恩於  
戲歌大呂而舞雲門已備升禋之奏帶干將而秉玉戚  
實嘉禦侮之勞服我寵光勉而忠槩可

除鄭藻加食邑制

門下朕肇道德之精敦典禮以秩元祀蒙天地之貺思  
敘福而錫庶民矧時左城之良克相上儀之備誕敷制

綽孚告廷紳保信軍節度使領閣門事鄭藻詳練有材  
敏通多識抗壇于外身兼五善之能秉鉞在廷職總九  
賓之禮雖承榮乎鐘鼎之胄每勵志於夙宵之勞當大  
歲於宗祈實首參於奉引鳴玉祇導既靡忒於令儀執  
膳寵頒宜遂膺於徽數爰加采戶併衍真祖共服靈釐  
式彰慶典於戲明昭上帝具拜康年之休錫予善人均  
承大賚之渥往欽予命益懋爾猷可

除張子蓋加食邑制

門下朕卜豐穰之上辰具華玉之嘉薦熙紫壇之路用  
逆釐于三神御丹闕之門敷大賚于四海乃眷介藩之  
舊肆頌恩綍之新安德軍節度使龍神衛四廂都指揮  
使提舉佑神觀張子蓋體負趨材識明善志建旄受任  
是為帥閭之臣束髮從戎蓋本勲家之子方聯華於廂  
衛仍均佚於內祠迨舉嚴裡式覃慶澤載衍圭畚之賦  
膺增節鉞之光於戲天子祭天既被執膳之錫將門有  
將毋忘濟美之圖益懋忠勞欽承渙渥可

除韓公裔加食邑制

門下朕丕歲帝裡顯承天祐觚壇奠璧之次光穆穆而  
月升黼席畢觴之餘瑞穰穰而山委均時嘉祉賁我舊  
人華容軍節度使提舉佑聖觀韓公裔迪德有常秉心  
無貳依光潛邸素同七姓之盟受命介藩晚建十連之  
節雖奉祠而處內能謹度以班朝眷言欽燎之成允賴  
忠勞之助併加爵邑具協典彝於戲蘋蘩蕝藻之可羞  
矧備展牲之禮煇胞翟閣之有畀豈遺執鞅之臣其對

恩輝以綏福履可

除劉寶加食邑制

門下朕揆吉天元之旦承禋帝時之陽三靈嘉虞並舉  
瘞燔之禮萬福降輯俯同軍國之休念列將之撫師錫  
大廷之孚號安慶軍節度觀察使天武四廂都指揮使  
鎮江府駐劄御前諸軍都統制劉寶忠謀自奮勇畧無  
前任總戎弋擁十連之戟轟威行軍市肅萬竈之貌貅  
干戈既戢於邊陲部曲自安於次舍屬修郊報阻持節



以侍祠載考國章宜徹疆而均惠用責陪敦之數式彰  
曠蕩之恩於戲受朕執膳既等祀戎之事敦詩說禮無  
忘德義之經茂對榮懷益圖整暇可

除南平王李天祚加食邑制

門下朕明德恤祀欽柴宗祈承靈億以賓八鄉既備宣  
延之禮轅孝熙而撫四極爰加布護之恩乃發號於明  
廷用賦釐于藩服推誠順化崇義懷忠保信嚮德安遠  
承和秉禮歸仁功臣靜海軍節度觀察處置等使特進

檢校太師兼御史大夫安南都護上柱國南平王李天  
祚誠心蹈義令德思恭襲帶要裳克紹世封之履航琛  
贊賚每勤時事之歸奠國壤於南交炳官儀於外服方  
紫壇錯事茂承主日之祠想丹徼聞風彌洽望雲之喜  
宜趣盼於惠餽式增衍於圭畝併加功號之崇均示慶  
餘之渥於戲震來致福夙嘉享上之誠雲施咸亨誕受  
昭天之澤益圖忠順懋對寵靈可

除闍婆國王悉里地茶蘭固野加食邑制

門下朕承天之序享帝于郊潔普淖以薦芳丕擁下臨  
之貺舉洪頤而升燎聿瞻南煬之光宜渙渥恩用旌遐  
服懷遠軍節度琳州管內觀察處置等使金紫光祿大  
夫檢校司徒使持節琳州諸軍事琳州刺史兼御史大  
夫上柱國閣婆國王悉里地茶蘭固野蒙承世德志慕  
華風撫茲丹徼之邦知方自守占彼青雲之呂嚮化惟  
勤舊秉節旄仍分茅社矧在熙成之旦當加慶賚之章  
申行戶封式洪郊霈於戲昊天有成命敢忘昭受之休

中國有至仁斯被函蒙之祉欽承明訓益懋永圖可

除沈該觀文殿大學士官觀制

門下輔相彌綸庶務實關治忽之宜帝王體貌大臣當  
極始終之遇睠時魁望久服冢司俄釋秉鈞之勞趣頒  
上印之寵其敷予命以告在廷特進尚書左僕射沈該  
蚤負通才寢膺劇寄謂天之將降大任嘗拂亂其所為  
而古亦惟求舊人可共圖於有政屬予更化名自典藩  
首能副當宁思賢之心亟使居奮庸熙載之地宅我百

揆迨今三年試之以股肱康庶事之能每克勤於小物  
責之以夙夜事一人之道正當惜於分陰何懿績之未  
凝致煩言之有嘖既洊披於彈疏亦頻緘於遜封內循  
補袞之疎力丐懸車之佚平津謝病位高自以為無功  
石慶告歸年老不能與於議姑遂便私之志特推均逸  
之恩錫祕殿之隆名俾真祠之顯祿蓋遵彝矩庸示眷  
懷於戲慮天下之安危本欲任賢而注意全人臣之進  
退敢忘加禮以勸忠往即里居尚勤猷告可

乾  
坤  
艮  
巽  
震  
坎  
離  
兌

海陵集卷十一